

B I G A M
OBSERVATIONUM
MEDICARUM

Exercitii Academici Ergò

P R Æ S I D E

D. RUDOLPHO JACOBO
CAMERARIO,

Medicinæ Professore Ordinario,

Parente Suo Venerando,

Publico Commilitonum Examini

proponit

ALEXANDER CAMERARIUS,

Tubingensis,

In Auditorio Medico,

Ad d. 28. Martii, horis antemeridianis,

ANNO MDCCXVI.

Typis,

JOHANN - CONRADI REISII.

Per Illustri

Atq; Generosissimo DOMINO,
DOMINO

PHILIPPO HENRICO
A GOELNIZ,

IN WALDENSTEIN,

Seren. Wurtenb. Ducis Consiliario Intimo

Illustris Collegii Ephoro,

Dicafterii Aulici Præsidi, Civitatis &
Præfecturæ Tubingensis

Satrapæ,

Undequaq; Splendidissimo,

DOMINO SUO GRATIOSO,

Primitias Hæc Academicas

Cum submissâ sui commendatione,

Nec sine Voto

Salutis & Felicitatis,

Dedicat & Offert

Humilimus Cliens

ALEXANDER CAMERARIUS.



Σ. Θ.

Erax est omnis vita Casuum: præter id, quod ex instituto fit, accidunt quàm plurima, dum à sanitate in morbum labuntur mortales, vel à morbis interdum resurgunt ad sanitatem. Hippocratis monitum: nihil prætervidere: vetat solum inhiare raris, vult medicum attentum ad omnia, etiam quotidiana; Suppetit undique quod examinari meretur. Sic autem observando & annotando contexitur, quæ nec unius hominis, nec unius ætatis, est Historia Medica: Ita crescit indies, & fundat artem, manetque norma conceptuum. Facile quidem videtur non expertis, scribere historiolas, suis tamen non carere deprehenditur difficultatibus; Ut scil. non abundant in superfluis, aut deficient in necessariis, vel aliter rem proponant, ac reverà se habet. Quanto magis ipsa phænomenorum, tanquam totidem ænigmatum, resolutio arduum reputabitur negotium. Interim discendum est Tironi, & proficiendum ipso exercitio: postulandum tamen insuper à B. L. ut æqui bonique adhuc consulat tirocinia. *Deus autem misereatur nostri, & juvet nos! Ipsius enim providentiæ est omne illud, quod præter opinionem supra captum s. casu s. fato fieri videtur, ad Sui Gloriam, & miserorum salutem!*

CAPUT PRIMUM.

NUnciabatur autumnō anni nuperi Studiosis Medicinæ, in vicino pago diem obiisse suum filiam rustici, de quâ inaudiverant, ipsam diu, per urbem quoque, mendicam insolitum circumtulisse ventris tumorem, ut nec gravida tandiu, nec hydropica modo hoc faciliore, potuerit dici. Operæ igitur ipsis videbatur præteritum, eò excurrere, ad inquirendum, quid monstri hæctenus aluerit tantus abdominis tumor. Advenientibus narrabatur, pauperculam 30. annorum diu per pagos & urbem ivisse mendicatum, bajulantem onus suum, nec nisi à quatuor septimanis lecto dejectam fuisse, queri solitam interdum de ventris doloribus, magis autem de spirandi difficultate, sub finem de hâc solâ. De causâ manifestâ talis incrementi nemini quid constare volebat: Erant tamen, qui dicerent, fuisse primo habitam pro gravidâ, quippe falsam, sibi rem fuisse cum quodam, & luisse pœnam in carcere; Cum verò præterlapso tempore non pareret, nec tamen de cætero ægrota- ret, creditam fuisse gestare molam, vel &, variis per quatuor annos suspicionibus & rumoribus incertis, nescio quid vivum. Quæ- siti autem parentes asseriebant, menstruatam ipsam fuisse adhuc per duos priores molestiæ suæ annos, postmodum autem desiisse purgari; Misisse vel quater in anno sanguinem, parcè quidem, ad aliquale plerumque levamen in respirando.

Itum hinc ad Inspectionem, nam instabat sepulturæ tempus, utut loco minus commodo: Dubium utique erat primò, quid intus fuerint deprehensuri, cum venter satis æqualiter tumidus, umbilico quasi oblitterato, tensus & durus tactu solidi quid potius videretur continere, quàm humidum, nullâ percipiendâ fluctuatione. Interim reliquum corpus valdè macrum, non tamen plenè consumptum; pedes œdematosi modò, sinister dextro multò magis, de quibus tamen referebant adstantes, ipsos demum à brevi tempore intumuisse, per annos prius tumoris expertes. Gangrænosî per cutem ruboris aut livoris externè nihil; in dorso tamen à decubitu excoriatio.

Tandem itaque, præmissâ integumentorum cruciatim incisione, pungebatur obvia tunica fortis, tensa, spissa, & erumpebat statim pluri-

plurimum aquæ, primò clarioris, mox turbidæ, musto similioris, ferè inodoræ, non graveolentis, cui sub finem albæ particulæ, quasi adiposæ, videbantur permixtæ; Æstimabatur ad 20. mensuras nostrates, magnas, quippe quatuor librarum.

Emissâ tunc aquâ mirum erat non comparere viscera, verùm inquirentibus patuit, nondum penetrasse ipsos in cavum imi ventris; Ergo subjectâ adhuc tunicâ incisâ, & utrinque remotâ, venerunt in conspectum intestina cum reliquis, & clarè constitit, ipsa non nataste in aquâ istâ, nec de cætero à statu naturali abiisse, nisi quòd minora, compressa, & sursum trusa fuerant. Quod & à diaphragmate sursum pulso passi fuerunt valdè coangustati pulmones; per hunc medium ventrem de cætero nihil comparente præter naturam. Per marginem hepatis erat rubens livor; Et super colon lata flavedo. Incisis hinc inde vasis majoribus parvus cruoris effluxus. Tunicarum, quibus conclusæ fuerant aquæ, ductum prosequentibus, non alius æquè videbatur nexus, aut origo talis tantique utris, quàm ad latus uteri sinistrum, ubi & frustrâ quæsitum fuit ovarium, cum suâ tubâ, dum alterum in latere dextro demonstrabatur facilè in salvo, nec sine ovulis. Ipse autem uterus parvus, durus erat, exiguæ cum aperiretur intus cavitatis; præter illum qui huc tendebat vel hinc protendebatur saccum nec præter naturale quid intra se continens, nec aliâ ratione malè affectus.

Tantum est, quod suppetit de fatis quondam misellæ; ad quorum considerationem prius quàm accingar, monendum erit in transitu, cum dictum fuerit, sæpe visam mendicatum ivisse per urbem, ne quæ oriatur confusio, hanc tamen non fuisse illam puellam rusticam, quæ ante plures annos pariter stipem collegit per urbem, pro satiendo, quem utero gerere volebat credi, lupo; Hæc quòd venerit, quæ fata tandem habuerit, expiscari nequeo. Forsan analogus nostræ ipsi fuit saccus; Uti quidem jam dùm *Cel. Lentilius* in Eteodr. sonoris per flexuram sub hypochondrio sinistro compressi colli flatibus vel grunnitum, vel ululatum, verosimilius adscripsit.

Sunt igitur causæ abdomen in tumorem p. n. elevantes multæ & variæ, secundum consistentiam tam solidæ, quàm fluidæ, etiam flatulentæ, modo vel acuto se habentes, vel chronico. Prioris exemplum etiam auditum inter nos ante sesquiannum; cum adolescen-
tulæ per noctem repentè a doloribus vehementibus venter enormem

in modum intumuisse, ad mortem subitanam : hoc quippe apertò flatus magno cum impetu erupit, & in collapsò mox abdomine ultra mensuram liquoris fusci vix inventum fuit. Principium extraordinarii ascitico - tympanitici tumoris dedit stomachus perforatus, ex causâ occultâ, cum præter dispositionem teneritudinis & ætatis de causâ manifestâ non constiterit, quæ veneno æquivalens, quàm comesta pruna damascena, in foro emta.

Tardi autem incrementi, constanter etiam tumidi ventris, causam continentem declaravit mihi pariter inspectio pueri rachitici, in quo, præter alia rariora in artubus, ad pædarthrocacen spectare visa, hepar amplum, naturali multò majus, & flatu distenta intestina fundarant molestum onus. Quibus alibi tumores quoque mesenterii accessisse leguntur: vid. omninò *Exc. Dn. D. Zelleri* disp. d. gland. p. n. strict.

Transeant plura, in Collectaneis Variorum, & imprimis in sepulchreto *Boneti* obvia. Frequentior inter ventris tumores est dirus *Hydrops*, cùjus indè justior est metus & gravior. Et ad hunc spectat casus propositus, non ad illam quidem ipsius speciem, cui simpliciter mansit nomen, quæ aquam habet in cavo imi ventris fluentem, ut in ipsâ natent & macerentur quasi viscera, sed ad alteram, rariorem, quæ *Saccata* vult dici, & peculiari sacco conclusam tenet aquam, eoque hîc uno, simplici, magno utre; Aliàs etiam multiplici, multis discretis majoribus minoribus vesicis, etiam vomicis, composito. Hinc multum isti casui lucis accedet ab historiis parallelis; quales memoratu dignæ legi merentur in egregio promptuario *Eph. Nat. Cur.* quæ ipsas ita tumidarum figuras exhibent, Dec. 2. ann. 8. o. 23. & Dec. 3. ann. 2. o. 61. quibus præter laud. *Boneti* sepulchr. adde *A. Nuckii* Adenographiam, & *Harderi* Apiarium.

Subjectum Hydropis saccati concluditur duplicaturâ peritonæi, procedit à latere uteri, ubi ovarium cum tubâ; unde & peritonæi hydrops audit & ovarii. Occasione quorum dum historias Istorum colligo, necdum invenio nisi fœminas, quæ saccatum, utroque modo, tulerunt hydropem, in plerisque omnibus non sine nexu illo & progressu ab alterutro uteri latere; sc. ut alter saccum fundaverit in ipsâ tubâ, alter ab uteri latere cum suis appendicibus in connexum ipsi peritonæum & cavernosum ejus aqualiculum penetrare voluerit. Conferantur Laud. Virorum *Mercklini, Sponii, Zwingeri, Gabriliæ, &c.* locis

is citatis obviæ historiæ; ubi etiam occurreret aquæ adhuc plus, & longius gestationis tempus. Accedat iterum observatio, quam in diff. d. Vas. Lymph. Admin. *Exc. Dn. D. Zellerus* proposuit. Viri tales ita tumido ventre, ut crederentur hydropici, sed quorum post mortem sectio exhibuit tumores in mesenterio grandes, multum sebaceæ pinguedinis, &c. à D. *Hiarne*, C. *Raygero*, in E.N.C. 4. o. 166. & 2.2 o. 26. describuntur. Ad analogiam tamen hydropis saccati referri merebitur *Natta Gabrielli*, s. stupendus brachii tumor in E.N.C. 3. 2. & 4. descriptus, inter cutem & musculos membranæ adiposæ lymphâ adu-ctæ & infarctæ. Memorabilis etiam ingens in sene sarco-hydrocele, diu conclusæ & toleratæ aquæ in membranarum testiculi interstitiis, diu dilatæ operationis, exemplum, quod proposuit *Exc. Dn. Patruus* in curiosiss. Dissert. Epistol. Taurin. nr. XIII.

Causam occasionalem manifestam ex adstantibus suppeditare poterat nemo: Intelligendo ortum aliàs tumoris talis à prægressâ & perpessâ fortè violentiâ externâ, per lapsum, ictum, aut similem injuriam quamcunque: Emanatio fluxûs menstrui, generale aliàs muliebrium factorum principium, hîc non fuit ex antecedentibus, sed inter consequentia potius; quanquam non desit in historiis, quæ principium deduxit à terrore, cùm menstruaretur, ad suppressionem per quosdam menses, ut postmodum tamen recurreret fluxus. Hîc suspicio graviditatis & constans tamen menstruatio, minus bene cohærent; Ut fieri amat, cùm in plebe diversi diversa deponentes rem magis confundunt, quàm declarant. Interim occasione præsumtæ, vel, utut frustrâ, creditæ imprægnationis quæri pro fundandâ tali aquarum secessione & collectione possit: Utrum frustratio conceptûs inferre possit ipsius principium? Sive in termino à quo, per distractionem membranarum, s. altero per quem, in tubarum obstructione?

Modus fiendi secundum circumstantias non tam arguit hîc massæ sanguineæ vappam, nec illa viscera, quæ in ascite aliàs laborare solent frequentius; ubi disquiri meretur, utrum ex portæ venâ, vel cavâ derivandum videatur serum: sed particulare magis loci vitium subest concluso malo. Clarior credebatur rei hujus conceptus, cùm & uteri, & peritonæi vasa innotescerent per diligentiam anatomicorum lymphatica, siquidem in occultis, casu etiam fortuito, contingere possit eorum rupturæ hiatus, pro constituendo fonte. Non minus bene meritus fuit *Loverus* experimento suo, in declarandâ hydropis
genesi

gēnēsi cujuscunque, cū observaret à ligatâ venâ non modò vasa intumescere lymphatica, ductus conglomeratarum glandularum excretorios fundere plus sui liquoris, sed & in cavo, & interstitiis partium fieri quasi hydropem artificialem & extemporaneum: Ut proin venoso etiam in duplicaturâ peritonæi ad ovarium sanguini stricturis, obstructionibus, positum obstaculum inferre possit talem fluidi liquidioris, tenuioris sacco, simplici magno vel minoribus multis, concludendi secessum. *Bonetus* ex ipsius aquæ hydropicæ conditione diversâ diversam hanc scaturiginem voluit distinguere: Lymphaticorum vasorum reperationem ipsi ostendit aqua limpida, coloris expers, aut leviculè tinctâ; cum à venarum poris reclusis exsudans serum modò sincerum, modò aliis humoribus comistum, urinæ colorem exhibeat. Musto turbidiori comparatum fuit istud serum, sed uti dictum, post tot demum annos ex suo sacco emissum. Facto autem tali secessu, constituto semel fonte, tum ipsius porrò effluxum, atque adeo tumoris tardum quidem, prævalentem tamen progressum continuavit, promovit, non modò manens causa, aperti pori, hiantia vascula, patulæ viæ, dum urget à tergo sanguinis motus, & concedunt usque membranarum interstitia, sed etiam tanto temporis spatio ad talem locum non tam quæsitum, quàm inventum, quasi re bene gestâ, nitens & vergens consuetudo quædam invaluit; Ipsi simul interim membranæ non tam extenuatis, quàm potiùs incrassatis: quod & aliàs obtinere constat vel ex eâ quam reliquit dissertatione *B. Avus*, cui tit. Anat. Hydropicæ.

Rationes Phænomenorum ab inspectione ventris jam patent utcunque: Et melius valuit, & diutius circumtulit paupercula suum onus, ac hydropici, quia suus non fuit naturæ fatiscentis hydrops, quia salvis adhuc visceribus ortus, quia quò minus inundaret viscera densiusculis prohibebatur tunicis, quia liquor ipse veniens ex fonte non æquè impuro in corruptionem minus propendebat. Doluit olim ventre interdum, quo quidem modo non satis constat; Interim ut videtur vel à gravatione, vel à distractione; Quanquam per accidens conjungi etiam possint aliæ torminum causæ, ut errores diætæ, ut lumbrici, quales *B. Reifelius* simul observavit in intestinis fœminæ hydrope ovarii laborantis ENC. 2. x. o. 27. Dyspnoica fuit, bajulavit enim onus grave, pendulum, & ab utre tantum occupante spatium sustinuit distractionem collarum, repulsionem viscerum, coangustationem spatii quod debebatur respirationi, ita compressi pulmones plenè inflari non pote:

poterant. Interim laudavit Venæsectiones, utut parcas, frequentiores tamen; ab his enim æger per pulmones coangustatos trajectus sanguinis fiebat facilior, cum minueretur trajiciendi quantitas, aliàs accumulati-
one sui ægrius exantlanda, cordi plus laboris causatura. Menstruari adhuc aliquandiu potuit, cum uteri corpus & latus alterum fuerit in-
salvo; Nec hoc mirum, siquidem cum famoso tali hydrope saccato ad-
huc concepit & peperit non una, non semel, fide laudd. historiarum.
Pedibus diu ambulavit non tumidis, quandiu liber ab iis ascensus per
cavam in cor concedebatur sanguini, cum nec deplueret serum, quippe
conclusum. Donec sub finem ipsa moles tumere faceret crura, ut mo-
les fœtûs solet gravidis; quod confirmatur tumore sinistri majore, cu-
jus latus desuper magis periclitabatur, molestabatur.

Hanc ita resolutam Historiam sequitur modò usus tam Semioticus, quàm Therapevticus. Discimus ex frequentioribus cadaverum inspe-
ctionibus occultiorum subjecta & causas morborum, terminamus varias
sæpe vanas per vitam habitas suspiciones, prout hîc factum, ubi molæ &
cujuscunque vel solidi vel vivi incarcerationio ultrò cadit; In posterum ex
ipso talium observationum numero, habitâ sparsim annotatorum ante-
cedaneorum, concomit. & consequ. phænomenorum ratione, propria
saccati hydropis signa eruimus, & colligimus, ut in casum quemcunque
applicari possint, & distingui tam ab ascite simpliciter dicto, quàm ab
aliis tumorum speciebus.

Non sine prognostico tamen, morbi lento quidem pede tardoque
gradu, gravitamen fato, procedentis ad sui fastigium, donec vel acces-
su causæ cujusdam extrinsecæ, lapsu fortè, vel internâ quasi maturitate,
incipiente feri corruptione & prævalente, funestè terminetur, firmis quon-
dam naturæ viribus tandem moli succumbentibus; quanquam & ipsæ
ægræ perversis consiliis suum videantur accelerare fatum: prout osten-
dit jam olim Eph. Nat. Cur. Dec. 2. ann. 8. obs. ult. Ill. Præses Schræ-
ckius. Equidem quod obscuri aliàs, vel tandem cogniti morbi curati-
onem concernit, præter generalia sanitatis præsidia, si ullibi in hydro-
pe, certè in tali casu locum habere, aut opem promittere videtur para-
centhesis. A. Nuck. l. c. *experientiâ, scripsit, didiceram, illas, sc. tumidas,*
quarum facies colore grato est rosea, quas satis benè comedunt, bibunt, alvum
deponunt, urinamq. sine notabili molestiâ excernunt; quarum corpora nec
purgantibus, nec diureticis, nec diaphoreticis multum auscultant, ordinario
affectu uteri, tubarum vel ovariorum laborare hydropico, lymphamq. peculi-
ari sacculo inclusam, nullâ arte extrahi posse. Observat enim aquas ex

sacculo tali puncto parce admodum prodiiſſe, ſuſpicatus hinc ipſas abdominis potius inde demum viſcera inundaffe. Quod in caſu grandiorum fortè hydatidum punctarum fieri utique poſſet: In noſtro caſu non fuiſſet metuendum. Ut proin huc potius quadrent ſequentia ejus verba de concludiſ duplicaturâ peritonæi aquis: *In hac hydropiſ ſpecie longè tutius expeditiusq; paracentheſin inſtitui, quàm quidem in aliis hujus natura morbis*, ubi ſcil. contra indicant vitiata viſcera, &c. Spem faciunt iſta, ſed nec eam fundatam ſatis; cùm ſons non obturetur. Cum ſtupore legitur in ultim. ENC. tomo cent. 4. o. 172. toties adminiſtrata operatio, emiſſa tanta aquæ, purulentæ quidem, quantitas, ultra 720. libras decem menſium ſpatio, nec tamen exhaustus hydrops ſaccatus, repletis toties iterum, quibus conſtabat, diſcretis tumoribus. Utin omnem caſum de agnoſcendo tempeſtivè, coercendo fortè intra terminos, quanto magis de tollendo, hydrope ſaccato futura ſit conſultatio perquam ardua, ne tristem incurabilium augeat numerum.

CAPUT SECUNDUM.

Obtulit mihi hoc anno ſub februarii principium Chirurgus ex vicino pago extremum digiti articulum, quem ajebat fuiſſe ancillæ violentè avuſſum. Dignus primo ſtatim ejus conſpectu viſus fuit hic caſus, quem audirem attentius, auditum conſignarem, quin & conſignatum modò publicè proponerem. Quod ille igitur narravit, huc redit. Inſeruerat ruſtici ancilla manûs ſiniſtræ pollicem internodio arctiori duplicati funis, quo ligatus ad præſepe ſtabat boſ, cùm hic ſolvi, vel duci, renuens caput ex improviſo converteret in latus alterum vi tantâ, ut ipſa fruſtrâ renitens ſe tam cito extricare non potuerit, ſed primum anteriorem dicti digiti articulum uno impetu abreptum hoc ipſo perdiderit, & hinc ejulabunda currendo properaverit ad ſuos clamitans, totam ſe amiſſiſſe per bovis violentiam manum ſuam. Vicinus ergo chirurgus ad curandum pollicem mutilum citò advocatus ipſe eſt, qui portiunculam altero mane adhuc invenit in ſtabulo, eamque poſt paucos dies exhibuit & communicavit. Qualis tum mihi fuerit viſa, modò deſcribam; dein & puellæ fata ſubjungam. Magnitudo primò videbatur ferè minor quàm pro ætate ruſticæ jam adultæ, aut alterius digiti hoc fuiſſe extremum: Verùm ſubſtantia ipſius jam fuerat contracta & corrugata, non corrupta tamen, nec putreſcens, nec fœtens, ſed ex ſiccata. Unguis lividus; pulpa rugoſa, quaſi perſpicua; Cæterum omne hoc ceu ſtudio parum

parum obliquè abscissum, non lacerum inæqualiter; cum suo intus ossiculo integro. Præcipuum autem Notabile fuit propendens ab inferiore evulsi hujus apicis parte, cui firmiter nexa hæret, chorda quædam satis crassa, densa, fortis, etiam exsucca quidem jam & contracta, lumbrico tereti similis & æqualis, ultra quadrantem ulnæ adhuc longa, sed à pollice longo tractu pulcre flava, quasi succinea, glabra, clara, per reliquum obscura, fusca, & inæqualior. In latere externo ejusdem avulsæ portiunculæ non ab osse sed à carne dependet altera chordula, à priore benè diversa; multò enim minor est, brevis admodum, insuper valdè gracilis, parum ultra duos transversos pollices longa, filo vix crassior, latiuscula, pallida, interim etiam adhuc sat firmiter adhærens.

Sed ab eo, quod deperditum est, & cujus jactura modò est irreparabilis, ad id, quod superest, cujus conservationi erat studendum. Mutili pollicis curatio, quantumvis ob extractam chordam valdè suspecta, non malè tamen successit, nec difficulter, caruit gravibus symptomatibus, ut cito inciperet ancilla discere digitis indice & medio ducere fila. Uti enim non magni ab hero fuit æstimatum vulnusculum, ita nec puellæ longum à laboribus domesticis vacandi tempus fuit concessum: Ut plus habeat curiositatis medicæ hic casus, quàm chirurgus ferat præmii vel suffragii. Liceat tamen reflectere super ipsum, quicquid videatur incuriis, & tentare variorum, quæ in eo occurrunt, resolutionem notabilium.

Subiectum ergo solutæ in hoc casu unitatis, non sine deperditione quædam substantiæ, est Pollex manûs sinistræ, mutilus secundum sui dimidium; siquidem absolvatur partibus duabus, & reliquum quod subest spectet ad metacarpum. Portiuncula avulsa continet extremum ejus ossiculum, cum pulpâ subtus, & desuper ungue, adeoque etiam cum extremitatibus vasculorum huc terminatorum. Chorda ipsi adhærens, ab eo pendula, fuit *Tendo* longus & teres Musculi Flexoris, ab isto quippe pollicis articulo protendi & excurrere tanquam finis & cauda ad ventrem musculi, jacentis juxta ductum ossis brachii, quod radium vocant, describitur ab anatomicis, & repræsentatur in ipsorum tabulis. Breve & gracile duriusculum tamen filum, quod à latere externo pender, ~~nervum~~ ausim dicere, si fibras per illud liceret distinguere, quarum defectu, cujus istam dicam laciniam, dubius hæreo. Dum igitur cutis, ligamentum, quo nectuntur digitorum phalanges, & quicquid fibrillarum & vasculorum circumcirca est, passum fuit in ipsâ articulatione lacerationem & avulsionem à subiectâ manu; tunc tendo ille non hoc sed procul hinc in bene remoto loco demum disruptus est, non ubi terminatur, ve-

rūm ubi oritur, fortius adhærere visus ossi, quàm cui tamen continuatur musculo, distracto elatere partis tenacis, donec violentiæ causæ cederet in parte, qualishinc arguitur, debiliore.

Causa notoria fuit infortunium, cū ex improvīso vis major bovis indignabundi validè niteretur in adversum: Determinationem violentiæ hujus externæ, sive, quanto pondere appenso fuisset opus ad avellendum à corpore hunc pollicis articulum, ad æstimandam per libras vim ipsi illatam, quin ad evincendum in genere, quantum superet percussioni impetus vim gravitatis simplicis, philosophis modò mechanicis relinquam, quostamen inter vel ex hoc capite laudari meretur *P. Lana* in suo naturæ & artis magisterio. Interim hic chordæ firmæ & robustæ non minus fortis & arctus cum osse nexus fundat proximè potentiam movendi digiti. Mobilitas in contiguorum consistit articulatione ossiculorum, sic & apex cedere, flecti potest & moveri: Vis movens radiat è cerebro per nervum in musculum ita, ut terminetur ultimò ad tendinem articuli mobilis. Respectus quidem nervi ad fibras ventris, & hinc tendinis, quâ scil. tam divergant quàm coeant ratione, oculos fatigat anatomicorum, nihilominus ex pathologicis paulo post allegandum phænomenon, commune sc. læsis nervis & tendinibus fatum, probat, non simplicis ligamenti rationem sustinere tendinem, sed tueri dignitatem partis nervosæ. Hic si placeat in conflictu excurrere ad vexatissimum punctum physiologicum, quomodò fiat motus animalis, quis satisfaciet dubitantibus: Nervi utrum se habeant ut tubuli; musculus utrum abbrevietur ab influxu fluidi spirabilis vel liquidi? Vel num solidæ fibræ potior videatur vis & ratio? Si ascendatur altius ad vim in & à cerebro juxta nutum voluntatis illa omnia determinantem, tum res pro planè desperatâ erit habenda, si audias *Cel. Boerhaven* Instit. §. 19. 316. Illud manebit tamen, musculi caudam, ipsos de quibus hic sermo tendines, habere se ut funem ad os, cui neantur, quod trahunt. Nisi quis probeat illud heterodoxum: Musculum non esse motûs organon; quod vindicent de hac staticâ post *Borellum* & *Sturmium* solliciti.

Cū itaque robur quo pollet præ cæteris digitis pollex in suis fundetur musculis; Tum ab ab iisdem p. n. affectis dependent tot etiam eorum & varia phænomena pathologica. Dictæ chordæ cum suis sociis inquietudo est famosus ille in malignis motus, quem manus in exploratione pulsûs simul observat, tanquam subsultum tendinum, malitominis, dum tragœdia luditur in afflicto & periclitante systemate nervoso. Quin hæc musculosa vis est, quæ in summo spasmorum gradu

in ipso epilepsiæ paroxysmo, pollicem contrahit, contractum tenet, & adstantibus resistit, ut ægrè ipsum extrahant, tendant, cum citius ita solvi paroxysmum prætendunt. Quidquod interdum non minus tristi fato non saltem motus, sed & causæ subiectum est in extremo, unde sub sensu ascendentis auræ, sive per spirituum refluas undas, sive per oscillationes fibrarum tremulas, incipit paroxysmus caducus, urinam ligaturâ semper intercipiendus, cauterio constanter præcavendus. Cæterum, quàm afflictio non solum in partibus nobilibus, sed & in extremitatibus digitorum manûs non soleat subsistere, quin extendatur ulterius, hîc per brachium ad corpus, habito item respectu ad eum in dicto casu simul evulsum fibrarum terminum, pollicis unguem, exemplo possit esse paronychia, si quando intimius tendinem, periostium afficiat, utpotè acriter dolens, febrem accendens, ut vel frustra renitentem lecto figat; sc. hoc est reduviam curare non simplicem. Et quàm gravia minatur punctura, utut videatur levis, si digitum quoque non tam aliâ sui parte, quàm nervum ejus aut tendinem præcisè feriat? Intensus dolor & gradus invalescentis inflammationis præsentaneum sæpe gangrænæ inferunt periculum. Constat id tristibus infelicis venæsectionis casibus, si quando subiectus medianæ tendo bicipitis malè fuerit punctus. Sc. dissectum plane nervum & tendinem, quibus jam commune ferè dictum fuit hoc factum, minus metuunt chirurgi, quàm secundum aliquam modò sui partem vulneratum: quanquam enim prior casus privet partem ipsis respondentem motu & respectivè sensu, nisi quid suppleant vicini; Alter tamen graviores nervoso generi, & per hoc reliquo corpori infert afflictionem. Hoc B. Præs. *Volcammeri* fuit in ENC. 2. §. 155. Nervos læsos nisi dissecueris, aut adusseris, convulsiones exinde orituras esse. Famosa hinc sunt articulorum vulnera, ob consensum & progressum, qui se latius extendit: Uti quidem inter nos quoque Juveni vulnus carpo externè in ipsâ articulatione cum cubito inflictum, cum magnâ sanguinis jacturâ, flexoribus digitorum exteriorum partim discissis, partim semilaceris, superveniente febre vulnerariâ non extinguendâ malignâ, fuit lethale, ipso ad thoracem usque brachio comparente gangrænoso. Quò magis habent, de quo gaudeant, quibus impunè cessit lædi talibus partibus. Inter operationes chirurgicas est excisio partium corruptarum, & quanquam interdum non terminet malum, aliàs tamen non caret successu. Sc. ense rescindendum est, ne pars sincera trahatur, quod nullâ servari arte potest, & insidiatur vitæ totius. Sic exempli gratia

in ENC. 3. ann. ult. est obs. *B. Wurfbain*: pollex pedis dextri gangrenosus, feliciter separatus in viro, septuagenario majore; quanquam & ejusdem anni o. 146. *D. Riedlini* mereatur legi, de digito pedis maximo feliciter servato. Quâ quidem occasione nec illud memoratu indignum videtur, quod nobis exhibuit Juvenis, cui index dextræ obliquè transversim per os ipsum vulneratus, ut parum adhuc à parte internâ hæreret pendulus, ut servari posse vix sperasses, quem imprudens fortè resecurisset, vivæ parti per opem chirurgicam fuit redditus, conjunctus, consolidatus, ut adhuc, minus quidem agilis, numerum digitorum compleat, usumque præstet utcunque. Sed ad mutilos iterum digitos: Septuaginta principes amputatis manuum & pedum summitatibus, pollicibus, collegisse sub mensâ suâ ciborum reliquias, confessus legitur in *libr. Judic.* cap. 1. qui vicissim detruncatis pollicibus mulctatus fuit, & mortuus dicitur in urbe, postea demum expugnata, adeoque dubiè, an mutilationem istam habuerit mortis causam.

Parallelismum Historiæ nostræ subministrant ENC. Dec. 3. Ann. 3. O. CII. ubi recensentur fata chirurgi juvenis, cui simili casu digitus index, funiculo tenui circumligatus, circa medium articulum jumenti quod manu ducebat, impetu fuit evulsus, ut pariter avulsam hinc sibi totam manum clamitarit. Hujus etiam articulo dicitur adhæsisse simul extracta, ultra dimidiæ ulnæ magnitudinem, chorda quædam, pro trunco majore nervi cubitalis ibi habita. Narrat hâc occasione amicus, cum ab exploso, & simul disrupto, sclopeto, abriperetur viri pollex totus, etiam tendinem extensoris ad digiti longitudinem fuisse evulsum. Ad famam autem hujus mutili digiti sparsim memorantur casus plus minus consimiles; qui modò transeant.

Et vi quidem tantâ fuit opus ad chordam sanam sanæ parti firmiter hærentem evellendam: Simplicioris & nimis quàm facilis extractionis etiam exempla suppetunt, verùm aliter se habentium nervorum & tendinum, sc. putridorum & corruptorum. Utpote juxta ductum eorum scandit labes sphaceli, alius sæpe intus, quàm in cute comparet extus. Grave illud sphaceli, ab hallucæ pedis incipientis, fatum acutum aliàs & brevi funestum, ab amico per literas fuit descriptum raro modo, tardo sc. motu progrediens in senem, cum fortiter resisteret natura, interrim autem protraherentur extractu pedis talium laciniarum longiuscularum, filorum, chordarum, una post alteram; cum altero adhuc paradoxo magis phænomeno, sc. terminati spontè sphaceli, postquam satis partium mollium lentâ, siccâ putrilagine, & ossium carie, fuisset
absur.

absumtum, ut separato & excusso emortuo quod supererat vivum obfirmare se potuerit, & consolidare sub genu mutili sui pedis extremum.

Effectus mutilationis non fuerunt multi nec magni, sed admiratione potius dignum est, brachium sustinuisse violentiam tantam ac talem, absque eo, ut pateretur vel inferret corpori quidquam eorum, quæ modo tam febrili, quàm spasmodico læsiones nervosarum & tendinosarum extremitatum consequi non paucis speciminibus fuit declaratum. Si avulsio portiunculæ transisset impunè, ac patulum vulnus etiam ampliusculum interdum præ parvo & angusto minus infert periculi; evelli tamen chordam plus importare videretur. Certè tam longus est tendo, ut ex muscoli ventre extractum & abreptum fuisse oporteat: Hunc turbas non dedisse, præter spem omnino evenit. Non potuit non lacerari vasculorum & fibrillarum copia: Cur hæc non irritarunt jugiter, valide? Cur non stillarunt illa, quod extravasatum rueret in corruptionem? ut vel hinc per sinum aliquem diu multum materiæ purulentæ vel saniosæ flueret antrorsum; vel elevaret ibi in brachio tumorem quendam aperiendum? Quod non factum. Ipse quidem actus intimum tulit doloris sensum, quem ejulatus satis declaravit; & in progressu ad tactum chirurgi explorantis juxta tractum illum brachii interiorem versus flexuram cubiti ægrius id ferre, querelas movere, & cum citò fila trahere inciperet, stuporem quendam pati solebat: Verum hæc omnia non eo gradu, nec pro proportionem, ac importaret læsæ partis & læsionis ipsius conditio. Utrum laceras per distractionem & avulsionem fibras natura fert levius, aut unit facilius, ac alio solutæ unitatis modo læsas? An profuit, fuisse teetum, per modum cuniculi subcutanei, locum, unde evulsus tendo? Et exclusum aeris accessum? Superest, ut multum tribuamus constantiæ & robori naturæ, cum ætas & duri vitæ generis consuetudo faciliorem hîc tolerantiam, feliciorem curationem promittat; Et suum quoque tribuamus dexteritati chirurgi, benè deligantis, antrorsum magis, & lenibus compressionibus saccum subcutaneum præcaventis.

Sic pervenitur ad Curationem. Opus quidem laudat artificem: In eo sunt præcipuæ partes naturæ sanantis, sunt tamen & suæ artis opem ferentis. Quantum ex discursu percepi, multo apparatu illa non constitit. Quod omnium rerum primum dicitur, hîc fuit observatum; sc. vocari & venire chirurgum in tempore, ad vulnus recens. Sub adventum non fuit opus ischæmis, s. sanguinem sistentibus, cum non multum ejus eruperit, etiam in progressu novus fluxus nunquam supervene-

rit; sc. arteriolarum graciles ramusculi distensi, discerpti, in se resilientes erumpentem terminarunt. Inprimis sibi curæ fuisse dixit Ille, nudum trunci ossiculum obtegere, obducendo statim & in singulis deligationibus, quantum licuit rarò institutis, cutem antrorsum, ope emplastri ad fracturam, sub digitali operculo præstantis vices sururæ incruentæ, & firmantis etiam articulum à distractione infirmum, cujus in flexurâ ad volam cutis quoque lacera. Defensivum à manu ad brachium fuit spir. vini camphor. non epithemata, cum abessent & emanerent graviora symptomata. Utrum aliquid intercesserit sympathici, non satis constat, suspicari tamen licet: Si vel fraxini lignum admotum trunco, vel pulv. sympatheticus inspersus parti avulsæ, transmittatur; dum amputatos artus alii de camino suspendunt, hîc in loco temperato siccam servari particulam consultum fuit. Sub his non malè processit curatio, sine dolore notabili, sine accidentibus, protracta tamen ultra mensem. Tùm cutis crassa circumcirca abscedens locum faciebat novæ succrescenti, extremus verò apex habebat quid luxuriantis carnis, alumine usto absumendum. Curatione tunc ad finem tendente fuit etiam hoc rusticæ propositum, sed ad quod ab ipsâ confusè fuit responsum: Qualiter se habere ipsi videatur superstes pollex truncus. Etenim insigne alias paradoxæ sensationis exemplum observatur plerisque ab amputatione artuum, ut habere adhuc putent partem sui, quam diu est quod amiserunt, nec habere solùm, sed & dolere perindè, ac cum haberent adhuc olim: Uti quidem in specie de clavo pedis dudum amissi longas adhuc auditas querelas fuit relatnm; quid quòd podagricus quondam inter nos amputato brachio nec à chiragrâ postmodum vixerit immunis, & ad finem vitæ servavit sæpe dolentium digitorum quibus carebat ideam. Cæterum quid in hoc casu fecisset quicumque alius, vel judicasset faciendum, modò transeat: Censor æmulus in altero pago statim terebinthinam melioris notæ fuisse instillandam dixisse fertur: Olei quidem terebinthinæ, uti & tincturarum balsamicarum, vernici exquisitæ tenui analogarum, laudes læsis tendinibus, in vulneribus articulorum, passim resonant. Tandem parallela ex ENC. citata historia modum curationis quidem non exprimit, successum tamen ipsius recenset quoque felicem, nec stuporem, nec paralyin, manus passa legitur, sed motum & sensum servasse planè expeditos & integros.: Ut in laudibus & gratiis etiam hic terminetur discursus.

TANTUM!

SOLI DEO GLORIA.